

景

文

集

四









景 文 集

(四)

宋 祁 撰

景文集卷二十

五言長律

鹿鳴筵餞諸秀才赴舉

今日眞良宴。歡持鳴鹿杯。初飛禰衡表。共識子虛才。龍沼雲鱗動。鵬溟浪翅開。危言切晁董。祕思屬鄒枚。經市騰裝早。封軺續食催。應須戒驅弩。翹待駟車回。

送承制劉兼濟知原州

假節分州郡。掄才出將門。還提射聲旅。上以禁卒千人爲君帳下并破護羌屯。君兼涇原路都監尺詔方臨遣。新書得細論。旂曾陪獵帳。戍校接歡樽。後伍隼囊密。前驅鼓吹喧。隴笳梅落怨。邊陣月殘奔。赤白猶傳警。先零久負恩。行期雪家恥。三捷奏天關。

早春雨中因呈邑大夫

瑞澍霑春陸。膚雲壓暝臺。嚴寒休雜下。風好卽東來。遠岫吞將盡。陰霞照暫開。徧滋畦下麥。併濕隴頭梅。灑畱南魚躍。漂蘆北鴈哀。蓬乾釣師臥。疔冷牧騎回。天發千驍電。人同百里雷。我私欣遂及。頌扈九農催。

送范希文

日夕朋簪遠。空成咄咄嗟。危言猶在口。飛語已磨牙。室救鷓鴣毀。庭喧獬豸邪。青蒲空頓首。白簡遂爲環。身歷千金險。頭經一夕華。便應過楚澤。何異向長沙。簣土障河拙。園葵望日晞。盡焚溫室草。尙得使君車。勝壤堪懷古。扁舟復載家。此時能痛飲。努力詠餘霞。

喜有秋

順氣縣區廣。嘉生告稔初。人驚萬箱入。天賜九年儲。絕塞元休馬。吾農先夢魚。牛應賣刀後。酒是乞漿餘。祀續田神鼓。郵喧粟尉車。是年名大有。敢告史臣書。

荷花

別岸香風起。橫塘夕霧開。歌須靜婉至。步憶貴妃來。拆藕冰絲剩。翻荷孔蓋回。曾經佛圖咒。解壓柏梁災。盛府開爲幕。騷人借作媒。謝才方麗句。卓寡比愁腮。有意緣誰苦。名蓮固自猜。鬢形侵寶髻。燭柄近宮煤。游羨龜巢密。看防漏葉催。使君迷已久。落晚且徘徊。

早濟江步

南浦招招子。中途靡靡心。歸舟一葉小。秋水兩厓深。露鶴淒仍斷。風蜩細欲沈。桂華翻落月。榆影送橫參。壯志兼時晚。勞愁已日侵。霜摧過江枳。鐘眩避風禽。薄宦真蓬累。歸期問藁砧。惟餘搖落意。天寓共登臨。龐祕校掾九江兼歸汝南迎侍

長停愁不淺。征袂拂殘梅。潘御家園近。毛欣府檄來。晨羞魚尾潔。春溜鴨頭催。拄頰談無對。參卿掾有才。
城隅山疊映。樓戶月弦開。麻樹藏環感。因君寄九迴。先君昔掾九江。予與伯氏皆生于麻舍。舊老今猶識之。

送次饒趙職方罷成德軍通判還朝

倅乘淹榮序。封軺促覲期。文章二臺妙。昆弟五常眉。樹隱征郵密。花留祖蓋遲。秋毫供握處。春草見歸時。
書笏人思對。垂囊客愴離。羨君如彩鳳。先集翠梧枝。

泌陽王介夫

上笏蘭臺彥。能文江漢靈。貪持御史劾。不顧大夫醒。詆毀真銷骨。嫌疑畏殺青。投冠集烏署。解紱墮鳶溟。
毛脫荷囊筆。塵昏寶帶釘。書空寧咄咄。避弋更冥冥。校尉貪廚釀。臨川集貝經。光華覆益日。哆侈譖人星。
生計依江芷。年芳老砌蓂。無人舉幡救。渾涕望明庭。

還都有感

去國已十載。召還今見收。初無潁川最。真忝茂陵求。物色多新識。寒溫減舊游。宮毫與塵晦。省樹向人秋。
蹇乏三千敏。恩難萬一酬。重尋紫荷橐。卻侍翠雲裘。建禮文書少。湯官餅餌優。屏營趨虎殿。子細認奎鉤。
曉節誠知止。吾生況若浮。身來雖魏闕。病免合滄洲。淺醉貽樽恥。衰容作鑑羞。歸年非鴈後。破月是刀頭。
依聖讒方弭。逃陰景自休。乞骸從此近。終計返林丘。

歲周移書課版

漢史傳循吏。唐家秩省郎。海禽驚廟樂。池鶩費君梁。巾禿聊蓬首。帷閒卽偃牀。案杯過永晝。寺鼓報殘陽。東帙雲籤冷。窺園李樹僵。後車常擊轂。猥酒不空腸。未易矜刀筆。徒煩裹服章。歲周無吏最。天極正包荒。

舅氏自壽陽由京師歸安陸

道舊欣來駕。銷魂遽遠離。顛毛同白日。舅雖大予一紀。然予今已白頭。俗眼暫青時。客飯稽留數。古詩。趣令辦粗飯。慎勿使稽留。齋醪

酌遲。風波須畏險。老大共餘悲。楚莽先春動。梁雲向雪垂。還家存別墅。他會看圍基。

仲微相過把酒有感

故人當止酒。今夕喜銜盃。事與朱顏改。年將素領來。鹿車君偃蹇。鶴祿我裴回。紬史餘三擿。爲郎愧一臺。洛吟真可效。僮賦久成吟。平日雩風瑟。塵撓爲試開。

送樞直梅學士守并州

素領登朝舊。黃樞遞直新。還持漢家節。坐福晉墟民。旆羽凌霜曉。袍花犯雪春。連雲祖壇幄。隘道舞驂塵。檄楯邊書息。羹羊府宴均。唐詩存雅俗。亥字訪遺人。緣飾資良守。都俞重老臣。莫爲葦月調。行此冠華紳。

上春晦日到西湖呈轉運叔文學士

春徧西湖上。湖濤綠勝醅。驚魚迎瀨躍。鬪鴨擁波來。柳已綠烟重。花仍赴暖開。側汀烟媚篠。臥石水銜苔。

岸轉橫杠度。川窮飲舫回。暗浮蟲肆役。閒立鷺毵毵。野畔平如界。林蹊潤不埃。光浮好雲日。影倒靜樓臺。山色乘晴露。霞容著暝催。溪行凡幾曲。恨乏昔人才。

硤石乘舟晚歸

晚棹乘餘興。平川不駛流。山來疑逼岸。林度省移洲。郭迴花仍繞。岳寒桂自留。鼓聲風處疊。颿影浪間浮。候吏緣溪釣。迎旗駭浦鷗。嚮時天際遠。還有望歸不。

中秋望夕不見月

異時涼月好。常爾惜嚴更。此夜浮雲惡。胡然溷太清。心孤王粲牘。案對景山鎗。海蚌猶能滿。城烏更不驚。裴回循北牖。黯淡倚西楹。蛩杼逢時急。缸花得闌明。桂高應自秀。蟾遠太無情。坐想瑤輪轉。孤懷悵未平。

清明值雨

有淪興芳序。餘寒惜慘悽。遠山沈向盡。雜樹望先迷。天闊都成暝。雲昏本自低。漂灰禁餘火。浮棗祓殘溪。檻篠風爭亞。汀鳧夜不棲。篷聲攢釣渚。蓑滴擁烟畦。積潤侵重構。長嚴壓曉聲。游人盤馬路。獨漉逐春泥。

瑞荷同幹

協氣凝清籟。嘉祥擢鈿荷。共茄含瑞液。分蒂葢文波。魚戲浮香併。龜游得地多。房芝助連葉。宮樹讓交柯。柄合千絲刺。盤差五兩過。正須裁紫橐。回入從臣歌。

愁吟

夜雨平階滴。寒燈照幔孤。未生靈運草。先據惠施梧。千里徒傷目。三年欲變儒。回腸啼絡緯。遠恨送襜褕。怨曲傳繁瑟。悲歌缺唾壺。此中如借問。掩鼻願操觚。

偶書

遠作分符守。猶爲持橐官。易漂非待煦。自栗不須寒。髮變他年素。心餘即日丹。過門休翫髀。逢路定沈瀾。忌刻殊忠告。蘧施足面謾。直緣蜚語入。正恨飲章難。墜後仍加石。驚初更避丸。讒箕元有舌。僞玉嚮無瘢。任拔終傾藿。雖憎亦佩蘭。隴雲平莽莽。林露夜團團。且欲排孤憤。還應覓暫歡。兩岐行處恰。五醜食時盤。地善人差逸。天高網寢寬。戀軒嗟棄馬。巢閣羨歸鸞。楚嶂橫朝塞。淮波漱夕灘。空將西望眼。隨日到長安。

柳佐乾德尉

塗會森璋罷。唐銓結綬初。家聲蘭倚玉。祖德鶴銜魚。周粟思馨膳。京塵惜弊裾。垂腰青采綬。薰帙翠芸書。鶴怨空山帳。雞棲外舍車。日期優政治。公啓達儲胥。

懷古眺望

城闔聊屬眺。千古恨悠悠。夏享空臺毀。韓亡故社留。廟祠旌穎鳳。溪水識巢牛。春色依林動。晨煙傍戍浮。房驕閒自集。田鶴叫相求。町篠沿緣密。川葭蠶靡柔。樸墟迷鄭鄙。馳路隔軒游。感昔如吾輩。曾經幾斛愁。

西域流根遠。中都屬賞偏。初無可竝色。竟不許勝妍。薄暝霞烘爛。平明露濯鮮。長衾繡作地。密帳錦爲天。吳人語。覆爲帳天。淺影纔欲檻。橫柯欲照筵。愁心隨落處。醉眼著繁邊。的的誇妝靚。番番恃笑嬌。何嘗見蘭媚。要是掩櫻然。豔足非他譽。香輕且近傳。所嗟名後出。遺載楚臣篇。

滁州趙學士重修懷嵩樓

丞相懷崧罷。因之名郡樓。使君嗟久廢。華棟鬱重修。人世興衰換。山川處所留。落成今日宴。感舊向來愁。西北天根遠。東南地脉浮。雲生蘭葉棨。月近蒜條鉤。樹雜猿呼暝。風長鴈送秋。此時如極目。歸思恐難收。

開元寺塔偶成題十韻

集福仁祠舊。雄成寶塔新。經營一甲子。自至道乙未經始。至和歲乙未告成。高下幾由旬。屹立通無礙。支持固有神。雲妨垂處翼。月礙過時輪。頂日珠先現。條風鐸自振。沙分千界遠。花散四天春。億載如如地。三休上上人。堆螺俯常碣。繚帶視河津。陶甃勤爭運。園金施未貧。誰紆簡棲筆。爲我誌琳珉。

季春八日喜雨答李都官

夜魄離星舍。春膏浹大田。乍迷榆塞樹。徐暗柳營天。沼滴銀波蕩。階鳴玉綆聯。餘萌催沃土。殘魃趣沈淵。迺溼來鶯外。斜寒去雁邊。莓莓滋野秀。纂纂濯花妍。戴響饒農笠。眠聲羨釣船。罇雲時露日。迷岫旋埋烟。

酌酒聊相勞。斯倉貯有年。勞君歌閔雨。予志謝先賢。

賦得敗荷

爲結秋荷恨。因來溝水西。魚驚一蓋缺。龜落半巢低。細暗嬋娟渚。香乾敦宰隄。莖枯縈繭緒。盤側漏蛟啼。自此空瑤席。他年問濁泥。那堪塘上雨。點點共淒迷。

小荷

灑雨拳紅展。擎烟側鈿微。纔勝漢臣橐。未辦楚人衣。蟲蟲閒攢沼。差差靜隱磯。游防靈蔡重。戲怯孺魚肥。莖弱從風靡。珠成恐浪揮。文鴛不肯去。始得蔽斜暉。

馬上逢雪

馬上逢飛雪。都城觸望新。天如不擬暝。樹欲頓成春。霰急初鳴瓦。塗輕自壓塵。灑達先映璐。飄闕欲藏銀。宛轉呈歌麗。裴回逼舞真。散鹽拂波亂。飛莢點星勻。密影俄飛蓋。乾花看鈿輪。無煩溼潘鬢。今是二毛人。

南方未臘梅花已開北土雖春未有秀者因懷昔時賞玩成憶梅詠

江南寒意薄。未臘見梅芳。爲有輕盈態。都無淺俗香。香方云甲煎淺俗倚風斜夕臉。呵雪噤晨妝。刀尺憑蛟杼。比鄰託粉牆。高枝籠遠驛。側影照回塘。曠望黃昏月。嬾妍半夜霜。一身來上國。三載別炎方。不見南枝早。方驚北道長。當時猶引領。此際故回腸。淚盡羌人笛。魂銷越使鄉。危樓難極目。恨酒怯盈觴。未到盧家第。終

盧白玉堂

李少傅逸老亭

逸駕歡迎養。飛軒適所宜。營菟茲寓老。趨鯉卽聞詩。地勝心逾放。人閒趣自奇。嵩雲來冒棟。滎溜下通池。靜偶惟黃卷。僊謠雜紫芝。牕風伴披社。簷月對支頤。相筆畱齊榜。邦侯慶壽卮。美哉輦棘詠。兼記掛冠時。

答朱彭州惠茶長句

芳茗標圖舊。靈芽薦味新。摘侵雲崦曉。收盡露腴春。焙煖烘蒼爪。羅香弄縹塵。鑿浮湯目徧。甌漲乳花勻。和去聲。要瓊爲屑烹。須月取津。飲萸聞藥錄。本草茗以茶萸飲佳。奴酪笑僮人。雪沫清吟肺。冰蕤爽醉唇。嗅香殊太暢。瘠氣定非真。唐陸鴻漸云。嚼味嗅香非別也。又母丘景言茶瘠氣侵精。此語非是。坐憶丹丘伴。堂思陸納賓。由來撤膩鼎。詎合燎勞薪。得句班條暇。分甘捉麈晨。二珍同一餉。嘉惠愧良隣。

答朱彭州喜雪

雪集先何所。天彭關內州。雲澌結河漢。風礫灑林丘。眩晃三霄接。繽紛一氣浮。光逢晨睨薄。花得冥寒稠。拂樹瓊爭動。縈牆粉暫畱。縮毛驚雀馬。埋目憚吳牛。客至蘭矜曲。仙歸鶴擁裘。鹽邊混熬素。玉處亂方流。併響鳴巖竹。分滋浹壘甍。印沙鴻鴈喜。蔽葉鷓鴣愁。蒙福沾餘潤。稱觴隔竝游。錦官才凍雨。廣和負妍謳。

訪李生野墅

風物澹蕭辰。陵阿訪隱淪。野杠裁度馬。溪路劣生塵。認菊知陶宅。觀禾識魯園。林臯偏樂我。魚鳥似留人。山霽羣妍露。林虛衆籟新。長沮亟相語。非敢問迷津。

書懷寄郭正

僑籍依三輔。愁顛偏二毛。星灰對逾盡。淚卷掩劬勞。併歎絲兼路。都捐筆與刀。思旌初不定。離緒僅堪縈。醜是流離子。材真樸遯曹。未成虞弁進。旋似郭竿逃。邑聚嶮峒合。都城鬱律高。惟餘故人意。戀戀劇綈袍。

腐化何微眇。孤光只自求。單飛一金躍。羣散數星流。廢苑蒼茫夜。離宮窈窕秋。戍埤同燼落。客幔共燈愁。明滅風前亂。裴回葉處留。人間厭白鳥。不爲盡餘羞。

和梅侍讀給事秋雪

朔氣迎秋晏。因成糅雪飄。園賓驚早賦。郢曲愛新調。雜霰鳴寒擗。紛花混晚蒼。光含闕邊鳳。溫借省中貂。縞頃纔供望。鹽波已屢銷。今年屬清思。旻寓共寥寥。

春前二日獲雪

佳雪春前降。層陰臘外留。日昏霏霰集。風定舞花稠。浩氣皚皚徧。繁光袞袞流。灑林初亂塢。拂瓦暗平溝。洞壘三雲仗。山迎萬玉侯。客車羊作駕。仙斃鶴供裘。只有歌堪和。都無色可侔。險堆憐傍砌。斜溼愛侵幃。

面旋成遲落。繽紛不頓休。粉塘連北渚。縞頃接西疇。興往惟思戴。賓來但憶鄒。絮痕侵柳動。鹽影著波浮。宿莽攢瑤草。長隄臥素蚪。正緣先畢雨。併欲潤天麩。應禱驅民瘠。呈祥溢里謳。長人蒙帝力。歡酌任言酬。

小雪

低雲淡河界。零霰集天涯。樹亂三眠絮。叢迷五出花。舞風都擬重。入隙故成斜。密瓦平將半。前山暝欲遮。漸堪迷淨練。併欲誤疏麻。粉出房陵水。鹽飛海岸沙。舟來戴逵宅。客過李王家。此日長安酒。旗高未易賒。

感懷

天與疎慵地。人無榮進心。死灰差免溺。棄杖卽成林。主諾固多暇。避賢懷所欽。難邀潁川鳳。敢望漢臺金。倚酒狂雖在。荷蓑歲已侵。恭聞容考績。緣此未投簪。

新筍成竹

雨町犀株突。陽皐錦槩攢。竅均軒世律。皮解漢廷冠。冉冉生能直。蕭蕭意自寒。翠雲舒作葉。碧血染爲竿。稍弱烟方定。筠浮粉未乾。拋陰照流水。迸節犯朱欄。會待翔鶴集。非緣戲馬殘。林間誰共賞。坐想七賢歡。

景文集卷二十一

五言長律

送馬軍范太尉格

平狄方開府。鏘羌舊著名。君于陝西戰功最多。新提建章騎。入領羽林兵。賜橐千金重。留車兩印榮。已封頭尚黑。休戰脾還生。大旆前驅影。鳴鏡後隊聲。較壇勝算爵。客飯飫侯鯖。山背迷榆塞。雲披認薊城。介圭朝漢幄。鈞仗侍軒營。悵別疎華恨。勤歸杜杜情。君看畫像處。麟閣近西清。

喜連君錫過郡

稍稍客引去。依依君見過。胡爲困重趼。正欲問無他。古者他爲人患。每相見。問無他否。飯黍驚方熟。犀談省舊訛。感餘祇恂悅。衰罷有蹉跎。直取憂襟解。聊從醉弁俄。緩行清白酒。隨意短長歌。皁壤星霜晏。纓環塵垢多。且應留從僕。同賞二山阿。

送聞大夫遊西天

五竺能仁里。重游路不迷。詔辭丹鳳北。身到白龍西。野淨榴花早。林暄貝葉齊。暮雲程次闊。斜月笠前低。燕嶺長銜霧。金河不貯泥。梵王分供食。戍校接征鼙。宰塔方增飾。祇園得徧躋。無容帶歸錫。秦蹕待新題。

覽中丞尙書譙陳二郡新詩

自頃辭台路。陪京擁使珂。遺音追正始。新韻徧中和。贈答劉公數。登臨叔子多。腸迴初有感。耳熱遂成歌。驚夢春塘草。歎顏雪席醅。拍殘吳子夜。唱殺楚陽阿。勝氣籠雲沆。清懷貯月波。無妨燦顏謝。莫獨與羊何。譙里鳴騶入。陳郊露冕過。二邦留雅咏。棠樹共婆娑。

感事寄子明中丞

久玷三雲從。仍叨千石榮。羸軀付多病。怯計會無成。出守非嚴助。何年召邵萌。風摧向陽養。霜變度江橙。畫閣勤聽訟。春疇力勸耕。遂慙循吏術。姑促縣官征。害馬直宜去。勞魚實恐頽。人心久忘戰。朝議近論兵。戍鎖關南數。邊烽隴右明。將機猶嘖喏。賊膽尙縱橫。說士爭操牘。闕下獻方略者蓋千計謀臣屈請纓。已聞疲轉粟。

安得但嬰城。且許和戎利。重尋撓酒盟。安危繫公等。指授盡時英。幸有千金募。須容八陣精。待衰曹劔鼓。長揖亞夫營。刷憤宜修德。時巡況作京。詔以大名府爲北京矢方射罽冢。力欲斬長鯨。憲紙言常屢。王塗日以清。悉

心前席重。直指佞人驚。仗下霜餘凜。班回佩倚鳴。早調黃鉉鼎。催獻惡臯羹。顧我罹飛語。于茲類倒行。鬼神慙賈誼。脣舌避君卿。直道今寥落。狂辭先猥并。椎如莫邪鈍。俛若小冠盲。秦俗矜車甲。周詩賦旆旌。會當濡橐筆。企詠二邊平。

寄題外門亭園

外家真大隱。亭圃枕城闔。談樹能留客。飛鷗不畏人。白雲仙嶺曙。脩竹楔堂春。溪遠尋難盡。林幽趣旋新。愛山仍作屐。裁穀便爲巾。僧赴禺中飯。樵歸落照鄰。宅成翻忝相。里舊況依仁。千騎過從數。連章刻翠珉。
喜刁從事見過

窮閭久藏疾。有客獨迴輪。密契瞻松茂。羈懷慰蓼辛。猶龍八才子。

君家昆仲皆當時之譽

嗅雉一畸人。藜藿仍開逕。

樵蘇賴庶貧。吾僚青眼舊。今世白頭新。尙倚王陽仕。終彈屋幘塵。

楊都官知隨陽

君自蜀守爲計俸既而出郡

棧道迴忠馭。牢盆幹計貲。文書三署草。兄弟五常眉。遽爾分符竹。欣然捧詔芝。疾驅關外傳。奉引漢東旗。夕月同離恨。春膏徧我私。他年五君詠。應記阮咸麾。

和龐丞相

顧我支離甚。惟公念不才。朱顏爲列郡。白髮入中臺。閣道通天祿。宮門拂斗魁。論班元後鄭。作賦或延枚。病肘垂楊老。危心一櫓摧。根愁江北變。葉喜洛陽來。自昔邊州重。當年蜀馭催。燒烽看朔漠。捫井歷崔嵬。粗可繙前史。何能調禁財。流光成浩蕩。孤宦易嫌疑。曲外悲絃刺。機頭謗錦開。無功慙遠志。有吏笑然灰。左轉眞虛忝。仙曹復濫陪。門鵬愁眩轉。軒鶴老毳毳。傾否知攸往。成章慙所裁。賈生空問卜。楚客但勞媒。特召依明主。生還揖上台。緹油觀冊府。巾履記翹材。長跪懷人句。徐傳道舊杯。今茲宣父冶。終得鑄顏回。

送常熟尉錢訪

雋譽高鄉品。仙姿並國游。新恩紺綬綬。遺社酎金侯。賦閣諸僉筆。塵緇倦客裘。平明僱櫂鷁。幾信候潮鱸。下陂蓴菜箸。持螯酒溢甌。江南三月草。爲子剩離憂。

寄王崇

君年三十餘棄官隱居商山

築室占層峯。高眠商嶺東。鉢薰諸佛飯。牕占上皇風。餌桂將成父。攀芝固有童。驚猿參唳鶴。仲鳥雜經熊。客有希何點。人多拜德公。春雲不持寄。誰欲問山中。

詠史

古有容容福。人譏齷齪員。生能巧作奏。死戒直如弦。欲重高門地。非論媚竈天。詩書大儒家。絲竹後堂旃。東閣翻芻馬。西園竊富錢。道謀誰執咎。戶選不因賢。朱鼓成妖日。羌鴟原注音芬案宋文鑑作雛非是入賀年。須防反室詔。終取闔門憐。異日讒成錦。先時默似蟬。空貽後人嘆。流涕掩青編。

贈通教大士善升

此心通妙法。他劫侍尊顏。水月何嘗動。煙雲相與閒。香浮經葉暗。霜點頰髭斑。施寶上人往。銜花谷鳥還。梵潮鳴夜浦。天柱落秋山。句偈聊持贈。非緣文字間。

奉和長兄歲晏抒懷

天暮雲雲繁。相將客兔園。老從星髮見。歲伴日車翻。別葉晴猶舞。征鴻暝更軒。事君纔寸祿。知我是空言。競進家爭壁。同聲伯有墳。重吟探懷句。更代一狐溫。

寄天休學士

時遞宿館中

春暝蓬山直。知君思緒多。玉蟾吟瀉滴。朱幕臥生波。談麈飄無幾。書刀削久訛。魚沈江上夢。雞唱汝南歌。落蒂燈煤暗。雙盤露藥和。烟浮温室樹。雲澹客星河。牟首傳清戲。章溝疊迴躡。子雲惟寂寞。尙自奈嘲何。

夏日舊疾間發

老至非無素。憂來詎一源。河魚真得疾。牀蠹誤成喧。咬咀供晨七。蹒跚逼夕軒。何宜忝蓬觀。祇合令文園。霜挫顛毛禿。雲添眼膜昏。問天寧有禱。依佛卽忘言。燕麥搖風砌。蟻苔壓雨垣。冒榮難自効。三宿戀君恩。

蘭臯亭

張學士充別墅

信美蘭臯地。疏椽構迴軒。山林閒處樂。溪瀨靜中喧。春桂開前塢。秋菘接後園。舟來無盡曲。客到不空罇。夕月生帷鑒。晴雲抱棟痕。主人貪細績。未暇答驚猿。

送胡學士赴益州漕

帝念西南重。頻年輟俊翹。還臨二星野。催駕一封輶。地出襄中險。梯連劍外遙。蹲鴟蔽川沃。流馬餉軍饒。檄去方移蜀。書成遂薦譙。客橙薰露夕。官錦濯霞朝。卓市醪華美。渝僮舞勢趨。省蘭聊罷幄。亭柳重攀條。

煩使資游及歸懷極本朝前知宣布曲即日徧歡謠。

羸疾益間呈聶長孺學士

病緒蹇騷。彌旬曠坐。曹緣憂初得損。非巧亦成勞。計月銷雙臂。驚年變二毛。隙塵間日滿。鑿藥碎時熬。顧此逢熙盛。紛吾異俊髦。濫趨華雉省。清舐翠螭毫。數米仍能飽。槍榆不顧高。聊尋祕方枕。更繕養生刀。夕穗含風月。秋禽企露臯。比來差勝晤。有意伴持螯。

予昔游雲臺觀謁希夷先生陳搏祠堂緬想其人今追作此詩〔案〕此詩見華嶽志。題作希夷峽。

仙館三峯下。年華百歲中。夢休孤蝶往。世言先生善睡。一寢輒逾月。蛻在一蟬空。有塚在華山下。藥笈微言祕。霄晨浩氣通。丹

遺舐後鼎。林遣御餘風。市霧沈荒白。殮霞委暗紅。峨眉有歸約。飛步與誰同。先生化去前三日。語弟子云。吾將游峨眉。弟子既不辨候而終。

還鄉

自昔去先開。乃今還故廬。隴桑濡露外。岳桂遺風餘。稍識烏衣巷。相過栗里輿。感存橫涕數。道舊愬杯徐。水涵溪容耗。林殘野氣疎。鳥喧晴處陌。烟宿暝時墟。彭澤期歸去。臨叩喜第如。擊鮮無久恩。趨局畏官書。

憶浣花泛舟

早夏清和在。晴江沿泝時。岸風搖鼓吹。波日亂旌旗。醉帟牽綳蔓。游鬢撲絳蕤。樹來驚浦近。山失悟舟移。

雅俗西南盛。歸輶東北馳。此歡那復得。拋恨寄天涯。

大像閣

追碧被層顛。追讀爲道。逐之追。靈姿映大千。天光白毫際。山色鈿螺邊。海客供鬢貝。江神捧坐蓮。銜花馴鹿往。投鉢毒龍眠。影壓中流浪。香飄萬里船。慈威濟終古。何止一長川。

覽蜀宮故城作

國破江山老。人亡岸谷摧。鴛飛今日瓦。鹿聚向時臺。故苑猶霏雪。荒池但劫灰。蘋遺糊處壤。闔記數殘枚。恨月窺林下。悲風覓隴來。依城狐獨速。失廈燕裴回。廢社纔存柳。陰垣自上苔。有情惟杜宇。長爲故王哀。

早夏出城書所見成篇

肅駕來墟落。悠然矚霽氛。飛花缺林影。驚鷺破洲羣。牧徑尋還失。蕘歌斷更聞。平蕪與天遠。孤日帶霞曛。梁雉今誰嗅。城狐古不熏。楚人矜節物。腰艾鬪蘭芬。

詠石

勝具論終古。尋幽屬政成。待時藏磊落。得地鬪崢嶸。錦駁苔文露。虹浮玉氣明。夢池分到影。牕岫讓吟情。乍恐翻湘燕。真疑刻漢鯨。滴秋湖溜入。觸曉寺雲生。紫漢仙機遠。西陵客棹輕。映花雕檻接。礙竹翠鞭橫。扣鼓非臨岸。傳書異穀城。願將侯鵠瑞。旦暮奉承平。

春雪

遲旭收天寓。層陰糝雪英。傍階聊積玉。妝樹旋消瓊。越驛兼梅墜。章臺代絮榮。風回飛自急。池暖白猶輕。曉溜承隅滴。寒澌逼沼生。持杯一相勞。膏脉趁春耕。

書局梅聖俞劉仲更二學士計問繼至潛然有感

二子繼淪闕。惜哉難具論。塵毛如昨語。墨藁未乾痕。雲霧迷歸柩。怆風慘葬原。風流盡逝水。日月促陳根。從古死皆有。由來命罕言。病夫長慟罷。翻幸歸然存。

思歸

心悸真摧檣。年衰逼異糧。西征何日賦。東走向來狂。遂隔承明謁。虛稱建禮郎。去都魂黯黯。思幄淚浪浪。見蕙慙紆綬。逢荷誤索囊。醒無次公酒。老畏侍中香。前席初延問。煩言已中傷。翕眉爭恃笑。繞指詎容鋼。事隱或投杼。根危因拔楊。陰收主父草。幾落黨人章。霧露淮天惡。亭臯楚塞長。平時猶有感。爾日固迴腸。溪漲淹蒲牒。洲風挫葯房。芴區晴外遠。山疊暝前蒼。毒虺寒猶蓋。飢豺晝不藏。若為貪坐閣。自此戒垂堂。淪骨深恩在。雕蟲緒業荒。身孤惟夕夢。時到黼帷傍。

破石寺

袞袞上層巔。飛空寶構聯。山林楚遺塞。樓閣佛諸天。午刹中峯影。晨香衆壑烟。齋淪一水注。開闢二崖穿。

旭日生岳嶂，歸雲宿檄邊。吾游常草草，暫對社師蓮。

哭中山公三十韻（案）中山公即陳元佐。

天欲鳴文鐸，公先露上珍。談鋒貫千載，文緯補三辰。海浪扶鵬徙，離朝籛鷺振。盪邪初奏雅，關路近還淳。汗竹刊譌徧，仙藜遞宿勤。漢家方授記，趙世本多神。稍上竅遼禪，親逢掘吻巡。每篇稱陸賈，四頌識崔駰。東封西廕公皆第頌有聲。接晝來詞禁，軒霞切睿宸。祥符大記公入四掖。金聲兼振玉，絲緒遂成綸。預讀蘭圖字，時參豹尾塵。批成五色詔，乞守兩朱輪。自外制守黎。虎幄思賢數，鼇山召節新。自淮陽召直入北門。請聞裨帝采，有意靖宮鄰。界虎潛輿譖，猶龍詎肯馴。符魚貪六六，國獬避狺狺。罷內制上。東震重光啓，南箕哆焰淪。觸邪觀豸久，斂手避聽頻。勇退寧無謂，斜飛故有因。罷憲司出鎮穎上。終承紫芝召，還返碧桃春。復入北門承旨。丁直何嘗屈，蘭幽止自紉。歌成接輿鳳，書止太初麟。修國書向成。竟遂東平樂，非憂宣子貧。復灑川。蒙莊祥止止，尼父誨循循。久負騎星望，非圖撒瑟晨。夜歌忽稀薤，仙壽頓摧椿。奠乏芻如玉，碑須白受辛。成蹊三榜士，始永定祥符暨今上天聖凡三典頁部。墜淚四州民。黎至灑凡四郡。自此亡遺直，誰將贖百身。他年虎賁飲，無復老成人。

三泉縣龍洞洞門深數十步呀然復明皆自然而成

虬洞闔靈峯，綠虛一綫通。雲披雙壁敞，樹補半巖空。概竹森烟霧，飛泉曳玉虹。重蘿不肯晝，陰壑自然風。嶺斷天斜碧，崖傾日倒紅。浮邱邈難遇，畱恨翠微中。

次韻和李長學士正月二十八日出郊見寄之作

雅俗傳祠日

州人以二十八日祠保壽侯及唐杜丞相侔于崇真堂

年華重宴辰。初陽澹江霧。小雨破街塵。

是日雨而不溽。游人皆集。

客蓋浮輕

吹。齋刀儼後陳。林芳催兔目。原色換龍鱗。壤路歌聲雜。構倡舞疊新。持杯徧酬客。惟欠眼中人。

紀贈致政燕侍郎

中朝鵠髮俊。得謝寵安車。碧落超新秩。承明別舊廬。叔時今老矣。司寇此歸歟。畫有封廚祕。詩多乙牘餘。雲情元自遠。舟意本常虛。酌酒朋三壽。揮金輩二疏。深恩仍給俸。令子復將輿。幾日西清對。留光悼史書。

答程職方冬至前一日江上觀魚

歲晏修漁事。邀賓俯碧流。鳴榔截橫浦。叢樛聚寒洲。舴艋爭離合。鷓鴣巧泛浮。漁子又以鷓鴣捕魚探頸而取之。魴來比河上。鱸出似搓頭。雪脣供庖俎。梅齋促宴甌。言詩知有意。不爲百金求。

抒懷呈同舍

本自草芥賤。非貪箕斗名。客心摧似櫓。官謗沸如羹。晝役迴腸數。秋扶病體輕。長年書轉忘。多露涕先橫。已分嘲楊吃。頻遭冒楚僮。矜毗兩蝸角。榮辱一棊枰。越蟹丹螯美。吳蓴紫線縈。他年五斗米。猶足代寒耕。

自詠

客舍張羅靜。流年激箭過。愁餘驚斛滿。淚盡覺珠多。鶻鴟悲秋極。芎藭奈疾何。振纓清濁水。持酒短長歌。

潘岳傷懷。蘇生困揣摩。經綸誰一問。適軸老中阿。

蜀地海棠繁媚。有思加膩。幹豐條苒弱。可愛北方所未見。諸公作詩流播。西人余素好玩。不能自默。然所道皆在前人陳迹中。如國風申章亦無愧云。

蜀道天餘煦。珍葩地所宜。濃芳不隱葉。併豔欲然枝。璧綵分羣萼。均霞點萬蕤。迴文錦成後。夾煎燎烘時。蜂蕊迎衝密。鶯梢向坐危。淺深雙絕態。啼笑兩妍姿。絳節排煙竦。丹鈿落帶垂。童容鄣畏薄。便面到憂遲。媚日能徐照。暄風肯遽吹。蜀少疾風。故花愈盛。惜親當晚晚。留恨付離披。麗極都無比。繁多僅自持。損香饒麝柏。照影欠瑤池。畫要精侔色。歌須巧騁辭。舉尊頻語客。細摘玩芳期。

七言長律

送趙御史仲禮之任南臺并柬兼善達公經歷元載王公用道孔公二御史

天子龍沙拜法官。議郎親戴辟邪冠。曉辭漠北冰霜重。秋到江南草樹寒。諫疏頻煩明主聽。題詩長共故人看。應憐閭里誅求急。尙布朝廷禮意寬。幕下清風鳴一鷄。臺端雪霽見雙鸞。寥寥渡海三冬鬪。颯颯凌空五色翰。晉代新亭蒼蘚合。梁朝舊地上花殘。石城慷慨悲哀粲。別墅風流憶謝安。千里憑高壓綉斧。幾回攬轡竝銀鞍。諍臣事業須公等。努力明時匪素餐。

去年十月去淮陽。今實周一歲歲中。三遷遂直內。禁作詩記其出處。(案) 祁於慶歷二年移守陳州。次年自杭州留爲翰林。

去年詔赴淮陽郡。手合魚符擁使轡。今歲恩叨玉堂署。頭簪鳳筆從宸游。孤蓬逐吹無時定。倦鳥逢林只自休。暗隙遂容私照日。奔湍信有不沈舟。身歸詎敢夸三組。目眩何能讀九丘。白髮紛垂文思輒。此生榮遇若爲酬。

景文集卷二十二

五言絕句

南郊祠所上章攝事二首

七里城南路。齋祠宿下房。
遠烟晨燎地。斜日夕牲場。
上辛茲攝事。瑞祝本通天。
自此春秋筆。還書大有年。

和人禁中作

鈞曲來深殿。宮花出御溝。
雲天正如畫。壁月在西樓。

太祖永昌陵

石馬開陵道。陰虬結廟阿。
飛雲似不去。疑誤大風歌。

太宗永熙陵

白虎晨湍迴。青龍夕霧和。
漢陵人易識。流水記岷峨。
故老今多喪。嚴祠日愈新。
青青陵上杏。神護五株春。

真宗永定陵

金石凝虛筍。旌旗落暗塵。唐堯遂不見。空有進羹人。
洛水縈祠外。崧雲泊棟端。橋山何必問。只是葬衣冠。

咏水紅

夏砌綠莖秀。秋簷紅穗繁。終然體不媚。無乃對虞翻。

和王君貺禁中寓直

長樂疎鐘斷。昆池夕照收。晚風生似雨。仙霧爽如秋。

中禁听夕氣甚寒爽

和延州經略龐龍圖八詠

〔案〕八詠題迎薰亭。供兵磴。延利渠。柳湖。飛蓋園。綠雲軒。翠漪亭。禳堂。今缺。綠雲軒一首。

迎薰亭

飛宇棘南徠。以待風之薰。因君奉揚力。并慰塞下人。

供兵磴

磴湍方電激。麩屑已雲霏。誠哉智者樂。力少功不貲。

延利渠

遵蒙本山下。渠激流且迅。無嫌萬折勞。思迴九里潤。

柳湖

波平柳苒苒。湖與柳共色。攀條弄潺湲。坐送春暉昃。
飛蓋園

千騎亟遊賞。賓蓋紛相隨。不知是日歡。何如清夜時。
翠漪亭

憑欄玩文漪。日與賞心遇。汀篠陵砌繁。沙禽冒波竄。
禊堂

悠悠水周堂。堂上列禊賓。賓勸使君酬。無爲負良辰。
和延州三詠

濟勝橋

溪光倒釣影。釣影跨溪垠。非論權取意。聊訂濟涉仁。
八覽亭

清潤堂

亭軒入空碧。極眺煩慮開。漢樹有葱蒨。隴雲多徘徊。
水容靜若鑑。天影倒虛明。勿使川風動。波生便不平。

漱玉齋前雜卉皆龍圖王至之所植各賦一章凡得八物或賞或否亦應乎至之意歟遂寫寄至之

牡丹

壓枝高下錦攢蕊淺深霞疊綵晞陽媚鮮葩照露斜

澹紅石榴

移植自西南色淺無媚質不競灼灼花而效離離實

蜀葵

紅白相嗣繁色純香亦淺相對庭戶間俗尙焉能免

萱草

修莖無附葉繁萼攢庭首每欲問詩人定得忘憂否

芍藥

有名見鄭風今賞異疇日采花當采根可能治民疾

竹

脩脩稍出類辭卑不肯叢有節天容直無心道與空

菊

織莖寒始密，秀葉晚逾滋。芳意君須識，羣葩搖落時。

芭蕉

不枝惟葉茂，無幹信中空。所以免摧折，爲依君子風。

春望雜詠

〔案〕原題凡三首，歸鴈一首，遠樹一首，輕烟一首，今缺輕烟一首。

歸鴈

刷羽梁王池，春至欲言歸。牽我東南恨，隨君西北飛。

遠樹

如帷復如薺，歷歷映滄洲。故障千里目，剩作一重愁。

次韻能相遊故園

戟檠嚴門第，銀金倦帶圍。如公三事老，從古幾人歸。

脩竹

北戶靜無塵，蕭蕭玩翠筠。此時刀筆手，慙愧殺青人。

濠上

莊生坐濠上，下玩戲魚躍。魚固不知人，人奚謂魚樂。

聞蛙二首

蛙聲直可厭。聒耳橫相干。怒氣何關勇。私鳴不爲官。
膨脝枵怒腹。日夕沸溪干。羣響何容罷。時無杜韞官。

古來吟

古來韋與杜。閱閱冠當年。今日城南問。惟餘尺五天。

竹

新筍漸盈尺。新梢已鋪瓦。燕雀忽相驚。深沈似隆夏。

九日

長愛鴨陂頭。平波澹不流。相君時獨汎。準擬五湖舟。

古意

肆威矜逐逐。索黨恣狺狺。盜跖真知道。餘財欲汗人。
青松獨受命。停雪待陽春。一遇樵人斧。同成樸檉薪。
虎嘯雲巖下。風生林嶺隅。須防威可假。慎勿逐城狐。
持鷓鴣謀壯。貪蟬鵲意深。漁人一拱手。彈者笑依林。

西齋新植萱草甚多作問答絕句二首

問

膩蘚金英撲。纖莖玉段抽。萱如解榮悴。爭合自忘憂。

答

我有忘憂號。君爲憂世人。欲憂憂底事。胡不暫怡神。

僧房白蓮

水風披玉蘂。溪露泣瑤津。花意如師意。宗雷社裏人。

重懷和靖林逋

高士非求死。天教隕少微。雲疑隱居在。猶傍嶺頭歸。

秋夕不寤

倦枕回尤數。東方不肯明。只將無睡耳。終夜著蛩聲。

閏九月晦日登舟二首

淮平舟未進。遠緒悵依依。勿謂王孫怨。先如春草歸。

二山皆在眼。未忍去淮津。三宿寧無戀。況非桑下人。

次韻和奉寧大尉相公見寄二首

寶弼昔營野。代工天眷深。此時蕭散樂。卻似住巖陰。
儒蘊披幽笈。仙圖啓祕關。嵩雲爲雨罷。來伴相君閒。

挑燈杖

處膏非自潤。在寸敢矜長。試用蔀家暗。迴爲隣壁光。

書齋前柏八株森植翠茂

總總長柯上。離離翠實疎。休誇冒霜雪。僅得守門閭。
古語：松柏爲百木長而守門閭。

一百五日作

雨罷飛花徧。緘愁對晚杯。客心將煬竈。同是一寒灰。
客舍已蕭寂。況逢龍忌辰。何煩申火禁。自有不黔人。

行客

游子何方客。征裾滿素塵。疲驂不進道。還犬復迎人。

小渚

輕烟變渚色。寒浪嚼隄痕。鳥去枝猶動。沙頽水暫渾。

十二月十八日會飲園夫獻桃花二首

今歲臘未破。明年春尙賒。天教催朔氣。先作塞南花。
晚秀尙可惜。早開真謂奇。君看早開處。定是向南枝。

叢菊

烟開容蘂密。霜重放叢斜。插著星星畔。潛郎稱晚花。

反舌

默默過桃園。穿條疊葉翻。夫君猶舌在。時宴便無言。

除夕

歷尾無餘日。更籌促曙躔。持愁賸殘歲。將老入新年。

野渡

行路到溪窮。寒流自浼浼。客立平沙上。篙人艤船待。

木芙蓉盛開四解

木末芙蓉語。當時不謂真。今來木末見。愁殺擬騷人。
楚辭。芙蓉兮木末。蓋指芙蓉假爲喻耳。

麴塵輕抱葉。宮纈巧妝叢。青女由來妬。憑君淺作紅。

浩露津細瀉。尖風獵絳英。繁霜不可拒。慎勿愛空名。雖俗名拒霜花。其實逢霜即悴矣。
千繞青叢外。攜觴只自留。晚花兼素髮。同是一悲秋。

木芙蓉

芙蓉本作樹。花葉兩相宜。慎勿迷蓮子。分明立券辭。齊時童謠云。千金買藥園。中有芙蓉樹。正指此木芙蓉耳。
一作淮南守。再逢霜豔新。花前今日酒。卻是去年人。予去秋已有木芙蓉四曲。故有是句。

夜分

此夕炎氛罷。浩然天意秋。桂華兼月上。槎影帶星流。

觀書

隱几窮千古。披經究萬殊。扶疎曾答客。涉獵恥成儒。

讀史

順諛要領絕。書罷付函封。隸子方求益。君非賣菜傭。
漢囊一需頭。竝薦五處士。由來角立名。獨歸徐孺子。

卽事

我來春已晏。道樾半清陰。崖暗石蹲虎。林明花散金。

湖上二首

秋水自然碧。秋花何意紅。乾坤搖落恨。只是爲西風。
樓迴銜空霧。郊長占暝霏。戲魚晴自擲。寒鴨夜還飛。

客舟

上溪不弛帳。下溪不打漿。上下各有趣。相遇風波上。

柳

濯濯縈春晚。依依帶暝饒。楚宮皆餓死。無計學纖腰。

海棠

薄暝霞烘爛。平明露濕鮮。長衾綉作地。密帳錦爲天。

詠茶蘼

來自蠶叢國。香傳弱水神。析醒疑破鼻。併豔欲留春。

詠棠棣

潘賦幽芳在。周詩榮鄂傳。佛輪千幅細。公帶萬釘圓。

景文集卷二十三

七言絕句

紫宸賜宴

戴斗通歡瑞節來，新年共上萬年杯。
宮花雜珥天心悅，併覺春從殿裏回。

扈從至奉先寺回

寶刹虹幡蔽曙霞，中天凝蹕轉雲車。
不妨歸路王城遠，滿袖飛花雜雨花。

和御製皇太后恭謝太廟

柔極探慈冠古先，謝成宗祏奉齋牲。
欲知太姒嗣音盛，親見周王作雅年。
〔案〕此詩爲仁宗所嘉賞，事見揮塵錄。

宣室

宣室崔嵬冠未央，殿帷深掩上書囊。
賈生始得虛前席，董偃尋聞獻壽觴。

聞新榜恩除異等輒成自詠

蘭署曾叨異等名，當年不與賦天庭。
塵容此際支離極，暫見唐家千佛經。

詔復制科有謂予應詔者

漢幄思賢尺詔飛。不材充賦諒非宜。就令能奏三千牘。未免長安欲死飢。

試秩祕書

綠底封書喬露光。試名仙局靄芸香。固慙衛國乘軒寵。猶勝唐家脫腕郎。

行香

朱華通奏見晨暉。內寺傳薰得早歸。私舍不應勞薄漚。天花仍在淨名衣。

余將北征先送同解

動地箕風百草乾。旗亭歌闕據征鞍。三冬大雪梁臺路。不敢逢君唱苦寒。

和晏太尉西園晚春

北平心計盡紅牙。五日雕鞍暮到家。林下覓春春已晚。綠楊枝暗不通鶯。
風籟幡幡續去條。一朝歡盡負霞朝。人間賦筆如公少。借問離愁著底澆。
渦曲攀花泥酒卮。來詩有懷渦曲此亦及之西園春去一凝思。謝公今繫蒼生望。無復東山攜妓時。

和承旨學士喜資政侍郎休退五絕

南闕騰章歸老初。安輪四馬照中都。不知誰在東門外。解道賢哉此丈夫。
聲名自昔拘如鎖。富貴由來薄似雲。今日冥鴻到天外。世間矰繳漫紛紛。

倦聽當關報曙光。深藏象笏解荷囊。身閒不傍功名路。方外方知日月長。
高挂塵冠靜拂衣。安貧知退似君稀。門前便是東山路。誰肯功名成名遂歸。
翰墨班中推舊老。功名罷後得高眠。欽風最有鼇山長。技癢思歸不待年。

和晏太尉三月初五日

東南郊日上團紅。浩蕩天區望始窮。獨愛暖雲如擘絮。紛紛無事映晴空。

和晏太尉三月十三日錫慶院二首

紺宇傳香鷺序回。南趨別館宴庭開。正因恩厚心先醉。不待君王常滿杯。

酒中優場下調喧。漢震鼓與下調笛合奏。如今鼓吹笛來時有之。故及此。連天震鼓舞行翻。看終白雪青山技。不覺斜光上繚垣。

和三司晏尚書秋詠

霜繁天白鴈行單。灌莽梢梢蠹早寒。正是河山搖落處。莫輕離思欲憑欄。尚書詩有莫憑高樓伸遠目之句。

溪澗水淨蓮莖倒。林杪風乾栗罅開。迴眺獨吟俄夕景。畢逋鷓尾過牆來。

和三司尚書宣德門侍觀燈

觚稜南抱綵山連。樓下沈香百炬然。此夜有人之帝所。默裁餘韻記鈞天。

都街見綠幢伎感而成詠二闕

迴望場中百尺竿。趨材飛捷過跳丸。垂堂亦有千金子。不敢中衢徙倚看。
子子危樞突倒投。負材驕壓漢場優。如何日到危身地。只丐旁人一笑休。

答客

十年通籍向蒼龍。孤直何緣免諱窮。欲識深心似魚鳥。不將山海換池籠。

承明年老厭文書。尺奏朝通暮剖符。數領近藩君莫笑。猶勝長被鬼揶揄。

羅含爲鬼揶揄曰。只見送人爲郡。不見人送爾作郡。

直舍飲錢楊子奇

杯霞三醕客顏醅。明日離魂伴玉珂。我爲有人輕狗曲。同居不敢唱驪歌。

與獻臣希深伯中源叔景純會飲城東小園

共到東園把酒卮。邀歡只畏酒行遲。尙書有對何能顧。況是尙書無對期。
林間曉日靜暉暉。判共山公倒接籬。不信佳人唱花落。試尋欄畔有空枝。

和參政丁侍郎洛下新植小園寄留臺張郎中二首

名園新景極幽尋。廊廟功名江海心。廣作巖扉容駟馬。他年此路待飛金。
水竹郊園占洛畿。私書素友約忘機。公今已爲蒼生出。雖有雲山那得歸。

答燕侍郎謝與端明李學士見過之什

方外仙卿岸幅巾。三竿紅日照霜晨。當關不用驚驕唱。共是揚家載酒人。

小雨

雨腳銜山夕照和。簾間涼氣晚來多。濛濛未擬昏城樹。颯颯先能鬧沼荷。

次韻宮師相公南游還舊山及闕下二首

丙御蕭蕭上翠微。故林泉石共光輝。曉猿夜鶴知無怨。得見山中宰相歸。
武當晏席揮金罷。鄭圃聯章驛霧成。莫獨名山藏祕本。別須留副在華京。

湖上

雪後雲歸露晚噉。凍舟猶自滯溪門。潛魚不上湖光靜。漠漠寒沙印鴈痕。

湖上見擔稻者

壓膝霜稻報豐年。鎌響枷鳴野日天。輔郡不知爲水耨。楚農新教命家田。
許人不善種稻。張鄧公鎮許召襄漢佃戶教種公田。

立春

春曉靈旂畫尾斜。漢官青幘待晨霞。宮中綵樹紛無算。不待東風已作花。

憶與唐公游西湖

紅鮮高下照橫溪。勃宰含情欲上隄。手攬綳莖那忍折。戲魚長在葉東西。

荷花深處放舟行。棹觸荷珠碎又成。莫道使君迷醉曲。分明認得採蓮聲。時席上唱漁家傲。予嘗是臨川公。荷花曲又古樂府有採蓮曲。

使君迷

西湖席上呈張學士

野菊斑斑岸蓼紅。使旗同駐賞秋風。斜陽更助憑欄勝。高下樓臺波影中。

湖上

蕭蕭露白蒹葭老。索索風乾楊柳疎。坐見漁舟歸浦盡。小篷明滅上燈初。
湖上烟光九月天。于今墟落古西偏。風波罷後汀洲靜。兩兩鳧鷖曝翅眠。
嵩驄凌秋爽氣來。川原高下一屏開。溪雲盡日無還意。正自天邊作雨回。

和晏尚書出城口占四首

沈莽團紅上曉原。露英風葉隔塵喧。天邊一寄冥鴻意。越乙荆鳥判自翻。
榔栗婆娑晝影圓。披襟凝眺此翛然。鷗留便作林間伴。正是甞黃楸紫天。古諺有黃鷗留著一麥楸熟。
千里梁陳一眺分。古愁今恨枉相聞。早須跋馬收清思。莫看沈西日暮雲。
終年羈束厭華紳。暫到林墟似出塵。盡是機心可忘處。爭教魚鳥不留人。

題提舉公會亭

一暈軒翼四簷通。草樹依然接舊宮。苑外自飄新歲雪。臺邊誰識故王風。
郡將夜醮分貺齋耐

殊庭夜醮肅真儀。奏罷雲章月已低。自笑談賓真俗骨。不齋猶得醉如泥。
郡將病免檄委郡事

郡將將書臥閣頻。假提千騎出班春。校中寧免時髦誚。欲作宣明面向人。

州將和丁內翰寄題延州龍圖新開柳湖五闋

湖中新水照春輝。綠徧垂楊千萬枝。此地得非名細柳。暖烟偏照亞夫旗。
閒駐春旗玩碧潯。波光杳杳樹陰陰。便將塞下風沙意。回作江南烟水心。
浚湖栽柳重城下。弄水攀條三歲中。誰見使君欹帽處。鴨頭波上雪花風。
弱柳毵毵湖上天。天青湖碧此留連。東方千騎浮雲駿。折得春枝便作鞭。
昔人楊柳詠依依。曾與征夫說戍期。看盡春條君莫歎。湖邊雨雪是歸時。

三年

三年官牒託東侯。旌蕩危心斛貯愁。一命鴻毛徒許國。單身螢火若驚秋。

鄰郡移書覆獄

堀堞征塵敝客裾。曉盤貪飯魯人蔬。多年養病先黃老。豈辨司空城旦書。

漢南使君數以公醪見問

江上春陰柳萬條。離人無處不無慆。阮生塊壘胸中極。故待兵廚著酒澆。

重陽前二日喜雨答泗州郭從事

晚秋嘉樹潤焦原。楚老相歡萬井喧。須信甘膏皆帝力。使君虛憑黑熊軒。
予下車六旬而蒙甘雨。非百里隨軒之應明矣。

相國寺祈雨馬上口占

青鴛剝下天香集。丞相車前佛月低。知有風人無限思。火城催向五門西。

黃羅襪

宋明帝病甚。詔褚彥回到曰。召卿欲使著黃羅襪耳。黃羅襪。乳母服也。謂令輔導幼主。後與袁粲同受顧命云。

袁褚聲華約略同。到頭忠佞兩成功。先皇謾賜黃羅襪。不識明眸有貫虹。

李樹

曾見繁英出縹牆。更將朱實奉華堂。蹊桃得地偏相映。莫損清陰欲代僵。

二月一日次利州見桃李盛開

蜀天寒破讓芳晨。雪蘚霞跗次第新。解把清香與行路。教人長憶故園春。
祇答晏尙書懷寄之什

赤白邊書費坐籌。尙餘清暇寄冥搜。知公撻句多情意。虛憶盧謔唱和流。
寄君貺王學士

雞檄防邊未得休。久停歡酌爲前籌。良辰併賞何憂晚。他日三公尙黑頭。
齊雲亭

憑高徙倚不成下。把酒直送斜陽曛。遮回西北望鄉眼。遭箇亭亭車蓋雲。
歸雲片片鳥行沒。晚日寸寸城陰生。林下本無蘇合彈。棲鳥何事向人驚。
中屏燕侍郎烟嵐曉景

澹峯危木掃天春。青到屏端憶故人。一丈輕綃千里思。爲君今日拂流塵。
桃

春香搖曳夏陰繁。蹊曲悵悵靜可攀。不是仙園三食罷。何緣靈核到人間。
絳蘂迎春五出齊。開時未識早鶯啼。不應盡占游人賞。留取餘芳付李蹊。

爲就東君得早紅。年年開趁落梅風。凌寒拂曉相看意。爭合尊中放酒空。
荒齋晝坐爲鳴鳶所聒。

喜鈔寒鴟六翮輕。蕭條墟落恣飛鳴。屠鄰腐肉知無限。少作揚州餓箭聲。
海棠

萬萼霞乾照曙空。向來心賞已多同。未如此日家園樂。數徧繁枝袞袞紅。
行藥

日烘霞底未成昏。拊物驚年併慘魂。李樹已僵生意苦。秋蟲何忍食桃根。
落花

前溪夜雨錦張紅。墜萼殘英繞暗叢。已與吹開復吹謝。無情畢竟是春風。
蟬

曉腹清呼飽露津。本求仙蛻遠囂塵。貂溫范蜜非吾族。枉共花冠託此身。
答梵才見賀忝承旨之作

玉署重來訪舊游。蟠桃熟徧碧城秋。不知身是真仙未。上到鼇山最上頭。
春日溪上

溪上和風吹薄雲。溪邊花木亦欣欣。州人未散煩攜酒。行樂先須讓使君。

春日溪上示南正四首

春雲拂拂柳搖搖。盡日相望似見招。此意只應人未會。自持杯酒上溪橋。
少華山頭雪未消。東風先已入花梢。今朝懶到溪邊看。林下流鶯似見嘲。
莫言雨後長蓬蒿。恍惚溪邊見小桃。待得數朝開爛漫。更須防避晚風號。
繞溪臺榭據丘陵。試對春風日日登。蘋藻鳧魚無舊恨。主人今是柳吳興。

尋春溪上

溪上尋春春已來。小桃初似剪刀裁。今朝判與諸人醉。暫見芳菲眼亦開。

挾彈林下

挾柘行吟涉庾園。鵲林驚繞果林寒。幕中病客殊真俠。虛費游童逐彈丸。

甲申歲首

故歲時光漏中去。新正甲子卷頭開。迎新送故祇如此。且盡燈前盞尾杯。

四日汎舟馬家園

淺蒲垂蔓兩厓深。閒刺烟篙到碧潯。會待乘春留襖帖。茂林脩竹似山陰。

觀鄰人賣餅大售

初日關門照上旌，芬肴無算客庖盈。本源漸大囊錢足，不復還家唱渭城。昔有窮人常歌渭城樂，後本源既大，心計轉慮，不復唱渭城矣。

曹景宗

快馬如龍度埽塵，射聲放飲藉汀蘋。鼻頭出火風生耳，寧願揚州作貴人。

秋夕不寐

風颯危檣浪拍船，三更殘月下空弦。離鴻過盡啼烏困，猶自愁人不得眠。

八月望夜不見月有感

素波涼暈淡層城，招恨三年此夜情。在淮南三年，逢中秋俱不見月。獨捲疏帷成默坐，暗蟲相應作秋聲。

九晏含爽助清輝，萬里重陰誤賞期。正恨浮雲無意緒，世間偏惱最明時。

北牆董羽水

萬疊雲濤墨海間，天機地軸共回環。悠然便有滄溟意，況在靈鼇首冠山。

馮家溪二首

穿竹尋溪到窮處，一泓寒碧澹無情。誰令巖竇有高下，瀉作潺潺鳴玉聲。
巒巒分渠激磔輪，雲噴餘溜下通津。莫辭滿掬雲湍碧，聊灑征夫纓上塵。

哀江南

病魂招得未。渾全。暝倚秋屏。豈是禪。一夢忽成霜蝶去。草深三逕。若爲眠。
鬼化斯文念賈生。精神瑠琢坐寒更。一書草就兼衣臥。恨煞東方不肯明。
龍山戲馬賞秋光。多少新詩入錦囊。磨滅英雄豈勝數。千年依舊一花香。

池蛙

越國車前矜勇甚。子陽井底太驕生。乘時不羨雲溟樂。口作儀同鼓吹聲。

齊張狗兒將拜儀同鼓吹聲

景文集卷二十四

七言絕句

和中丞晏尙書憶譙渦二首

幃幃行艫破練光。提鞭舊岸接回塘。使君幾作臨波醉。猶省當時問葛疆。
春波漫處尋他浦。晚潦清時覓故洲。使舸忽歸心賞罷。後來風浪但驚鷗。

重陽不見菊

戲馬佳辰菊未黃。有人惆悵獨持觴。心知不作忽忽意。故欲凌寒報早霜。
蜀地秋高未擬寒。翠苞如粒露華乾。重陽已過君休恨。留取金英晚節看。

柳絮

萬縷金長暖絮繁。雪乾雲困徧春城。衝風力盡飛應怯。試與鴻毛較重輕。

儒林

窮巷空傷老治經。由來命薄是諸生。正須盡力排黃老。刺處纔能得利兵。

江上阻風

百尺危檣倚曙空。古祠簫鼓隔丹楓。誰將一隻仙人箭。換作樵溪旦暮風。

招希元奕

飽食南榮曝晝曦。小星聯影入枯基。座賓只待王郎至。爲判南風不競時。

昌雨晚歸馬上口占

滿蓋繁聲結暝涼。獨驅歸馬向閒坊。鶯塵暫息非無意。半作衝泥污錦韉。

雜興

不學詩書君勿嗤。人間情僞古難知。第看陵麥青青句。盡是當年發冢詞。
商君要術惟疆國。孟子深心肯信書。大抵空言是糟粕。斲輪甘苦定何如。

讀桓伊傳

上前奏笛串奴髯。自倚哀箏詠刺讒。大傅一聞流涕久。使君于此信非凡。

途次清明

漠漠輕花著早桐。客甌餽粥對禺中。遙知闕下頒新火。百炬青烟出漢宮。

三月晦日送春

倏忽韶光第九旬。無花何處覓殘春。長繩萬尺非難具。誰與天邊絆日輪。

朱雲傳〔案〕韻語關

朱雲秋作詠漢史英氣凜生風。瀕死危言悟帝聰。殿檻不修旌直諫。安昌依舊漢三公。

七夕

烏鵲橋頭羽蓋移。秋風長有隔年期。七襄終日難成報。不是星娥織作遲。

庠局觀書偶呈同舍

蠹簡時披落暗塵。書窗風冷冰蟾津。不須長歎夫差事。恐有鄰房儂和人。

和人禁中作

前殿籠童畫鼓賒。對論兵食近袍紗。此時刻意言頗牧。不爲雲中首級差。來詩云。可飽。頗牧不重生。

題比郭巨然山水

鈿點峯頭蟲太虛。遠帆遙岸水平鋪。不知真到雲波上。得似工毫可愛無。

叢祠樹木尤岑蔚

祠憑怪神樹不伐。樹得岑陰神託威。鄉人奠酒女巫醉。祠樹不知誰是非。

西壁畫松

數株森立寫皴堅。霜骨鱗膚千萬年。秦帝從官徒自苦。取封不及大夫賢。

對菊有感

吹菊佳辰念物華。顏生不飯重咨嗟。故園舊種猶存否。露損風搖著幾花。

淮山

不見當年叢桂枝。空山嶽峯但霞霏。眼看春草萋萋徧。身是王孫未得歸。

答道卿舍人桐竹之嘲

桐竹連雲阿閣西。脩莖濃葉蔽璇題。本來鸞鷲排翔地。正恐羈禽不借栖。

竹

除地牆陰植翠筠。纖莖潤葉與時新。賴逢醉日終無損。正似得全于酒人。種樹家以五月十三日爲竹醉日。移之多盛茂。

擬西出陽關無故人

雨中柳色醉中迷。上馬彎弓散馬蹄。陽關門外故人遠。獨有殘陽相伴西。

人日

綵勝香羹樂上春。我懷前事悵佳辰。瞿曇尙笑浮生假。況鏤黃金假作人。

早秋二絕

斜規脈脈霞底去。早涼蕭蕭林際歸。年華搖落適誰怨。伯勞燕子東西飛。

離騷何苦怨題鳩。鷓鴣本因搖落鳴。寒蟬驚鶴亦無謂。要是愁人聞自驚。
驚鳥

遠夢回時路已迷。三更霜月倚樓西。驚鳥有底無窮恨。取向琴中作夜啼。

柏樹

昔記孤根百仞溪。何年移植對芳蹊。雲巖烈麝相思久。悵望清香未滿臍。
翠柏童然雜薊間。簿書餘暇獨來看。不須更共春葩競。留取青青待歲寒。

木芙蓉

寒圃蕭蕭雨氣收。斂房障葉似凝愁。情知邊地霜風惡。不肯將花剩占秋。

晚春

露花裊裊開還徧。風絮飛飛去不休。春解無情春亦老。欲將寥落與誰愁。

房陵舊第

讀去房陵席尚溫。回看北第已消魂。當時賀厦翩翩者。今日張羅不過門。

蘆

鼻娜脩莖青玉攢。鼻翁濯罷翠痕乾。湘君直寄江湖樂。要作風汀雨瀨看。

我慙散質山中養。君結孤根江上來。相對中間兩無用。菰蘆何處有奇才。溪蘆得種庭軒下。翠色雖新野色銷。要待九秋風雨後。冷梢危葉作蕭蕭。

過玉蓮湯

平日宮中賜浴時。玉蓮香目湧華漪。錦鳧繡鴈今安在。汨汨餘湯自入池。

出野觀農二首

杏葉莖芽正及春。風烟萬頃縹緲勻。果然莊腹三殮飽。悒悒深耕不顧人。炊饌中林烟火遲。勸農官吏駐春旗。蓬蒿意盛陽膏動。正是陳根可拔時。

過摩訶池二首

十頃隋家舊鑿池。池平樹盡但回隄。清塵滿道君知否。半是當年濁水泥。池邊不見帛闌船。麥隴連雲樹繞天。百歲興衰已如此。爭教東海不爲田。

危語

奔車下山朽索轡。倒行垂踵臨無地。碁子十二卵相疊。手探驪珠觸龍睡。

樂府

花外超超百尺樓。碧簾深下蒜條鈎。石城何似盧家好。曲裏分明兩莫愁。

次望喜驛始見嘉陵江得予友天章張文裕西使日詠嘉陵江詩刻于館壁有感別之歎予因戲答
二章他日見文裕以爲一笑

江流東去各西行。江水無情客有情。此地懷歸心自苦。不應空枉夜灘聲。
東流江水鴨頭春。南隔高原背驛塵。便使灘聲能怨別。此愁不獨北歸人。
入蜀

劍峯重疊抱巴天。從昔奸雄竊慨然。白腹黃牛餘讖歇。漢家尋用五銖錢。
除夕作

四十九年今日到。來驢往戚是歎非。牀頭周易有深意。自此恐須三絕韋。
夜分不寐二首

晴缸紅花久未落。耿耿秋思饒端倪。傾荷破月共天宇。女子牆高烏夜啼。
西風已飄上林葉。北斗直掛建章城。愁人底事最堪恨。絡緯啼時無婦驚。
御愛山

翠幘奔騰一氣間。六飛畱賞暫怡顏。君王草草非眞愛。心愧東方檢玉山。
詠史

一馬浮江擁瑞圖。青規羣彥倚長裾。本緣獻替居門下。不爲江蝦與鯁魚。
偶記洛下舊遊

洛陽三月見梨花。遙認清香識鈿車。今日風光兩無賴。莫愁應已嫁盧家。
虛名

身外虛名莫妄求。強關事事判悠悠。試看雲將三年役。止博鴻蒙一掉頭。
早春近野

紫苞如紐綴榆繁。春意惜惜徧近原。霽嶺浮烟含縹翠。泮渠新溜變清渾。
題朱四郊墅

菌閣平窺倚杵天。綺塍鱗隰逗春泉。誰將六國黃金印。擬換東周二頃田。
呈成上人

佛國天花兩送春。歲陰何意重相親。勞師且置彌天論。鑿齒今纔敵半人。
熊上人見過談理頗未得盡憶王侍郎共加研討

柱杖蕭然陋廡開。茗花熬綠淺浮杯。清言未到忘言處。正待裴家驛騎來。
讀巷伯章

孤節區區是愛君。危言未達已危身。豺牙虎爪銛于劍。不爲詩人食譜人。
野路見棠梨紅葉爲斜日所照尤可愛

葉葉棠梨戰野風。滿枝衰意爲秋紅。無人解賞如丹意。拋在荒城斜照中。

小荷

踏溪分藕養新荷。鈿蓋斜臨瑟瑟波。自是天姿不汙著。本深泥濁奈君何。

月桂

月面鋪冰不受塵。緣何老桂託輪囷。吳生斫鈍西河斧。無奈婆婆又滿輪。

晏寢

栩栩莊園夢正酣。曙霞分色照東南。閉門更費當關報。已是嵇康一不堪。
康書七不堪其一臥喜晚起

小池

細溜沙渠逗曲池。碧潄餘潤漬蟻衣。風休浪靜如圓鑑。時有文禽照影飛。

雪裏尋梅

雪裏逢梅近臘時。梅姿雪態兩相宜。羨君此處留清賞。看徧溪頭南北枝。

戲答天休

元夜天休移簡云薄暮即還家。繡老書酌酸酒以自娛耳。

老書堆几寧堪讀。酸酒盈樽不用除。料得君非貪九錫。短轅長柄趣還家。

紅蓼

花穗迎秋結晚紅。園林清淡更西風。纖條盡日差差影。時落釣璜溪水中。

泛渦水二首

川上輕風正滿旗。幽尋不憚進舟遲。蘭橈過後江烟合。卻見驚鷗自下時。
漠漠新葦上渚蒲。日痕波態共涵虛。無人解作江南曲。荷底田田自戲魚。

除夕

一杯芳酒夜分天。萬慮勞勞耿不眠。明日新春到何處。菱花影裏二毛邊。

望仙亭北軒晚思

北顧吾廬安在哉。天涯望眼到天回。碧雲向晚無情合。思殺離人未肯開。

中秋夜不見月二首

天上浮雲不肯歸。憑軒坐惜桂華西。一年此夕無窮恨。只是城鷗得穩棲。
萬里重陰晦玉輪。兔孤蟾遠託霄垠。世間未必皆同恨。亦有居心不淨人。

秋塘敗荷

去時荷出小如錢。歸見荷枯意惘然。秋後漸稀霜後少。白頭黃葉兩相憐。

東亭

櫺檻餘涼日未斜。海天相合碧無涯。樵風不動橋烏靜。時見孤雲伴落霞。

溪上

杖策溪邊興盡歸。片雲何事逐人飛。飄然自是無心物。欲去還來上客衣。

秋園見蝶

撲粉曾過宋玉牆。一身生計託流芳。不須長結東風怨。秋菊春蘭各有香。

送葉蘇州

臥錦簪花飄夕棹。兩吳芳樹隱春旗。爲尋劉白高吟地。酒熟螿香左右持。

濠上

惠非蒙叟非魚。濠上全知魚樂無。春水未深魚易樂。要須真樂是江湖。

對獵

黃山橫鶩曉成圍。後騎蕭蕭萬弩隨。當路豺狼宜一發。不須回首問狐狸。

九日食餠

廳館輕霜拂曙袍。糗餈花飲鬪分曹。劉郎不敢題餠字。虛負詩家一代豪。

黃葵

黃葵貴麗不夭饒。一朵新晴松下高。還似邇英臨黼座。曠曉日照天袍。

山橙花

故鄉寒食茶蘼發。百合香濃邸舍深。漂泊江南春過盡。山橙彷彿慰人心。

九日憑高有感

把酒憑高念歲華。此身流滯屬天涯。故園叢菊無人賞。露壓風欺只自花。

春帖子詞

皇帝閣十二首

康郊迎氣罷。暖信入嚴宸。暫遣星杓轉。令知天下春。

瑞福隨春到。穰穰正似山。君王寬大詔。自此徧人間。

穀管灰飛盡。金胥刻漏長。歡情與和氣。併入萬年觴。

日華初麗上林天。殿裏春花百種鮮。驅出餘寒還故臘。收回和氣作新年。

望春臺下春先到。獵獵青旂倚漢宮。水自北涯生暖溷。花從東面受和風。

蒼龍東闕轉春旂。絳羽林梢最早知。青帝回風還習習。黃人捧日故遲遲。
春風長樂地。春杖大明天。春酒皆千日。春枝卽萬年。
陽和今日到。景物一時新。陛下南山壽。長迎千萬春。
天上春先徧。世間人未知。黃金裝柳葉。紅密點花枝。
水暖蛟冰解。灰飛鳳管和。陽春與皇澤。併付女夷歌。
天矯蒼龍引翠旌。君王暫報出郊迎。勾芒一夜催春到。萬戶千門歌吹聲。
宜春苑裏報春回。寶勝繪花百種催。瑞羽關關遷木早。神魚潑潑上冰來。

皇后閣十首

青郊迎淑氣。華闕報芳辰。瑞木梢梢變。珍禽哢哢新。
春前已歲換。歲後始春來。綵燕隨宜帖。繪花鬪巧開。
曉天春氣淨融融。飛入天關第九重。靈沼水生初報鴈。蓬萊雲暖卽從龍。
宮裏春花纔灼灼。殿前春仗已峩峩。東風盡解天池凍。不及君王慶澤多。
誰道春從何處來。只從金闕徧瑤臺。蒼龍便入時巡仗。玉液還飛行慶杯。
嘉祐隨年至。皇恩共氣和。水痕冰處動。烟思柳前多。

曉佩搖蒼玉。晨旂亞翠旂。新年好春色。今日滿皇州。
暖碧浮天面。遲紅上日華。寶幡雙帖燕。綵樹對纏花。

迎春寶勝插釵梁。拂鈿裁金鬪巧妝。上作君王萬年字。要知長奉白雲觴。
雙闕鮮雲抱日光。朝來春意已昌昌。先從太液催波綠。後到靈和報柳黃。

夫人閣十首

雪罷雲初暖。天和日便遲。玉樓新燕子。襟下記來時。
春從何處生。先覺滿瑤京。冰解魚鱗散。雲飛鶴態成。
春天麗春旭。春酒獻春盃。樹待珊瑚鬪。花須羯鼓催。
銀闕崔嵬對未央。春來始覺好年光。風生禁苑無窮麗。日向仙壺一倍長。
東郊移仗曉迎春。已覺輕寒不著人。天瑞穰穰君澤美。併教和氣助佳辰。
春闕風光麗。春城歌吹喧。瓊蘇獻春酒。金薄鏤春簾。
瑞歷歲惟新。物華春可愛。雪盡林弄姿。冰銷水生態。
新年十日逢春日。紫禁千觴獻壽觴。寰海歡心共萌達。皇家慶祚與天長。
日照觚稜萬戶春。細風輕霧淡嘉辰。一番宮柳黃烟重。百種盤蔬紫甲新。

玉管輕羅和氣動。土牛青犢報祠歸。仙盤取露朝和藥。舞殿裁雲暝作衣。

余在北門時每立春必前索宮中春詞十餘解今逢茲日塊坐州閣追懷舊題續作六章

漠漠春從天際來。春旂已在望春臺。寒銷嶺上容梅落。暖拂江南放鴈回。
清曉東郊轉翠輿。蒼龍驅煖入儲胥。便回天上陽和氣。散作人間寬大書。
星杓夜壓禁城東。葭縠晨飛玉管中。撲撲烟花千戶煖。嘈嘈歌吹九門風。
漢宮節物重年華。寶勝迎春綽綽斜。不待東風吹煦力。剪刀催出上林花。
故歲猶長新歲晚。東君破臘便回春。花枝稍稍暗紅上。已覺輕寒不著人。
樓角紅陽上翠旗。欽頭新燕一雙飛。天將美景催行樂。剪盡春雲作舞衣。

景文集卷二十五

奏疏

詆五代篇

臣聞王者握命紀。操斗憲。題期立象。中天稱號。必有積德之祐。上凝霄極。不謀之言。下謠人口。或捍禦大患。身享其樂。或勤勞累世。后乃有興。是故總氣後應。則泄爲曠瑞。洪休震動。則耿爲烈光。塞摩天淵。施摩金石。震如雷霆。燦如日月。所以神明其位。鞏固其祚。乘雲高躋。與天同貴。大業旣定。垂世長久。後世雖有僻王昏主。猶得蒙業而安。爲此者非他。君道得而本基固也。臣草茅狂闇。弗達大體。不敢袖太古之事。角無用之文。竊怪土德之衰。五代狎主。何五代無道之短。而先王有道之長也。試迹其事。儻見其端乎。先王之興也。咸有絕異之姿。甚德之度。聰文敦敏。淵泉博厚。又有格天之佐。恢其謀。鷹揚之旅。輔其決。尙或惓然中昃。穆然深拱。瞿然如弗克。葦然而自戒。同寅協恭。致虔治平。五代則不然。臣主不肖。媮爲一切。自謂縮取備物。妄投天隙。庸人蹶張者。列侯土中。涓刀筆者。建宰相材。不逮古。謀不經遠。乃蕙蕙然相與臥積薪之上。倒太阿之柄。操持失統。斃踏不振。一夫大呼。天下合而軋之矣。先王之始王也。以治易亂。以寬代虐。人情莫不欲逸。因以輕其勞。人情莫不欲生。因以遠其死。賞未始由情而僭。罰未始爲私而濫。其改制

也。使日就于正。如行舟焉。雖不截流。漸靡而往。其易俗也。使歲安其教。如種樹焉。雖未驟益。有時而大。是以四海洗心于更生之辰。萬民翹首于整綱之會。五代則不然。觀覺以動。乘時併起。桀詐桀。亂濟亂。拯人于溺。而水益深。投人于焚。而火益熱。收聚不逞。衰合失職之徒。以爲謀主。剽劫民屋。略奪金瑤之聚。以悅武士。刈民之命。若草菅然。視邦之易。若置棋然。大欲得矣。終不知嬰廉愧。反仁誼。程天下之豪。革馬上之治。徒乃戮無罪以威下。爵匪人以悅衆。將軍臭乳。都尉爛胃。民不見德。惟亂是聞。故下利其亡。上階其亂。雖勃然而興。亦勃然而廢。古之王者。皆父事天。母事地。子育人。明德恤祀。祈天永命。以垂無窮之烈。五代則不然。誣神沒禮。或不郊見。禳祥雜揉。不可方物。童山斬木。空虛地藏。殺人盈野。流血漂櫓。是以父含隕蝕之怒。絕其命。母馮震陷之威。告其變。子乘捐瘠之亂。挺其亡。不過一傳再傳。陵遲罔紹矣。古之王者。改姓易統。咸有以損益其政。故夏之敵以野。商人救之以忠。商之敵以鬼。周人救之以文。故前車已覆。而後鑿改御。彼琴不調。而此瑟更解。五代則不然。自唐家失御。藩帥迭侮。朝疏封寵。夕希姑息。甚者自裨校而下。徧置私人。招來亡命。隸于牙帳。因國府庫。煽其異圖。鳥聲獸心。陰相鳴召。緩且傲法。急則稱兵。否乃煽山封水。與民爭利。方駕兼兩。輸貨無厭。覩面罔極。鈔食求飽。孰知有伏節之誼。死綏之守者哉。及罪盈情得。仰藥伏刃。尸元橫分。噍類滅絕矣。五代親罹其難。終不知損權柄。塞觖望。平鐫其邪心。漸出于公路。以謂勢之適然。亡具甚矣。自五代去。雖卽汴。建爲都邑。北據大河。西掩函谷。東漕淮泗。南馳陳蔡。皆天下勁

兵處也。地形便利，鎧馬犀勇。五代不乘時角力，削平天下，犁其庭，掃其閭，薪去不義諸侯，以虛其國。方且徧舞樂禍，沐猴而冠，遂使僞劉孽李，么騰數子，限長江，捶隕塞，闕高岸，踰短垣，倔強跳梁，坐飾邊幅，以黑子之地與中國抗衡。臣有以知五代之無能爲也。乃炕龍絕氣，非命之運，故天殃已加矣。臣昧死，臣聞夫吐珠于澤，人誰不含。集鳥之屋，理無妄止。是故太祖乘五精之運，契三神之驩，起而有之。撥亂世反之正，天下所以無敵也。且太祖以夏禹之敏，成湯之武，文王之小心，漢高之大度，又荷上真之眷，付畀四海，虓虎烏藻之師，效其力，負鼎前箸之臣，贊其務。受命之後，寒心銷志，不明求衣，南取吳，西取蜀，荆湘閩越，以次誅剪，靈旗所指，黃鉞所下，若震聲蜚響，雲徹席卷。日出海隅，罔不砥屬，輿櫬銜璧，赦而不誅者，孯然成行。悍將驍帥，驕而弗制者，旋正其法。萬邦止景，羣饜檢情，剗其戾文，蠲其苛制，重惜府庫，弗崇宮室。軍雖數出，民不加賦。是時少府水衡見錢多矣，而又法明令具，吏知所守，與天下更始者，大功數十。臣所不能盡道。夫不鍾大亂之剗，無以啓至聖。不當弗友之壤，無以建明德。秦刑塗地，炎漢繼之。厥或享國四百年，隋酷稽天，黃唐受之。厥或享國三百年，五代殘殺，我朝承之。斬除亂徒，肇立人紀。卜世垂祚，與天無窮。此上帝所以重景命，與人聖之厚也。詩云：商監不遠，在夏后之世。五代有焉。又曰：上帝臨汝，無貳爾心。我朝有焉。雖區區唐漢，不得竝日而語矣。

贊曰：朱石不君，漢周亂倫。殄我蘇氣，煽爲妖氛。地厭流血，天蒙戰塵。長蛇薦食，險鹿橫奔。六國弱姬，三戶

亡秦皇矣。上帝哀此勞人。戮絕亂命。光啓聖真。

選郡牧篇

昔王嘉之言。國家有急。取辦于二千石。二千石尊重難傾。乃能使下。臣嘗以嘉爲知言。夫王者靖居九重之中。獨運大鈞之上。雖有喟然愛利之意。下無由知。雖有曠然寬大之令。民無由曉。故臨遣二千石以鎮郡國。使其諭上之意以撫下。紬下之情以聞上。上下之際。沛然無壅。此刺史所以與國休戚。天子所以授任蒙成之意也。宣帝曰。與我共此。惟良二千石乎。故授受之間。不得不慎。國家茂稽天秩。祇建王僚。諸循吏以作民師。進正臣而端治表。番休遞上。以仁佐賢。振振焉鷺羽之集。西雖子子焉旗干之紕。良馬可謂得人爲盛。當事立功。然而政不加平。訟不進理。罪罟逾密。渣源寢漓。其一端殆二千石責任之不至也。請試言之。自太宗右文。真皇執競。陛下以光華重協。清和有聲。奮揚乾剛。總擘天綽。戎索不警。方內乂安。邊吏耳不聞檀車之聲。齊民目不睹贏糧之役。四十年矣。故所倚于二千石者。特皆簿領之期會。獄犴之文致。無益之細政。不急之常務。積習成敝。以爲二千石之職。適如是耳。故所任之意愈薄。所假之權益輕。或數月輒遷。或暮年罷去。送迎新故。旣已騷然。斷盜詆欺。寢亦隨發。且又敦薄參進。廉鄙竝塗。非有法度可循。條教可紀也。雖詔制凝密。法網周設。適足使中才懷疑。內顧下才畏罪。求免。懷疑旣功。無必成。求免亦無所不至矣。授受若是。國何賴焉。臣願一二以條其失。臣聞春秋之義。用貴治賤。不以卑臨尊。何也。上下

有級。則勢不陵。表率素定。則人知信。伏見今列郡四百。皆雜取朝著。以充守尉。不課名實。不覈賢愚。第以久次。一切署遣。雖文敏肅給。不絕于位。而疲驚貪冒。相繼已多。是使泥滓久濁。清流稂莠。寢害良稼。臣故曰。所任之意愈薄。意薄則官賤矣。所假之權益輕。權輕則器卑矣。威權既奪。而欲使人臨難伏節。義不內顧。不可得也。古者重名與器。非爲以虛尊加之。欲一民之歸。繫民之志。而後可使也。夫上有常貴。則缺望易裁。下無偷令。則善化日聳。習安其教。中道若性。故使之忘勞。悅之忘死。蹈白刃。赴滄海。不辭也。其惠之有素。治之既定。今則不然。賢不肯魚貫。悉材諸位。名姓狀貌。未簡上心。循言治行。弗允清議。直使之模表千里。宣贊五教。其路亡繇也。夫生齒日盛。闢寓日廣。而不講禮誼。以示之。泥軌物以納之。慎官司以式之。欲望龔黃之政術。召杜之治最。沒世不可見也。且水旱天所代有。兵革邦之常備。假一有緩急。則經度財賦。倚辦于郡國也。安靜方略。藉成于守尉也。背邪趣正。勞而不怨。繫之于廉恥。張而風俗厚也。三者治之大。而二千石爲之本。豈不重乎。又況風澆化污。政垢令翫。人不嚮誼。家無完行。秉偷薄之意。待不擇之官。持益輕之權。化已敝之俗。臣不見其易也。陶唐三考黜陟。則九歲矣。天道五年大備。則再閏矣。漢家勵精政道。而苦守令之數易。其治八高等。皆賜金增秩。以慰厚其意。由是而談。郡守之屢遷亟罷。古所弗取。平津侯曰。揉曲木者不累日。銷金石者不累月。自謂期年而化。尙竊遲之。臣以平津虛爲勝談。以邀誤賞。可矣。非極摯之論也。治民之意。異于是焉。先威以制其情。後教以定其志。信浹肌膚。恩淪骨髓。然後示之君

臣之義。父子之節。曠然一變。導之正路。不數十年。民亦不信。金石曲木。無情之物。一化不變。故易制焉。民者。生之靈也。教者。民之紀也。不植則僵。不修則壞。憚其慮始。必怠。樂其既成。則安。故曰。難艱之業。當累日也。臣願國家與大臣。試圖其事。遴揀守尉。必得其人。辭去之日。缺半日之閒。賜前席之間。陰察其言。退攷其行。練覈得實矣。然後久歲月以效之。必誅賞以信之。其治理轉聞。課品尤異者。賜金增秩。略循漢家故事。公卿空乏。以次升用。悉罷基年數月之命。不專常務細政之責。使其禮讓與于民。凌慢之心絕矣。賢才安于官。苟且之心塞矣。萬一邊場有重鎬之警。畎畝有二鬲之困。則斯人惟上所命。順指如意。豈不快哉。贊曰。良二千石。教化是職。弊出輕授。理與慎擇。千里模表。十行方國。天子是毗。吾民滋殖。

本風俗篇

夫民聰明精粹。內函五常。之謂性。剛柔緩急。外繫四方。之謂風。好惡舍取。悅隨上教。之謂俗。聖人知俗之易失。故建之以師表。壹之乎中和。尊尊以示恭。親親以教愛。悌幼以訓慈。先長以興讓。示義以尙忠。嚴刑以威亂。然後可與適治平之路。興愷悌之源。故紫服長纓。潛移二國。廣眉匹帛。爭尙四方。水任孟圓。草逐風偃。傳曰。上有所好。下必有甚者。惟陛下體乾之粹。縱天之能。堯言成典。禹身爲度。聖讒說。放壬人。重力田。憫庶獄。恤祀事。愛民力。定心而物自服。三年而言乃驢。卽位已來。未聞有弋獵之娛。聲色之邇也。每方蟻透。涉毛澤。徵愆。則必瞿然克躬。怛然振乏。逮繆寡。協孤終。率人以仁。靡民以義。禮注其耳目。樂淪于骨。

髓所以訓齊天下之理甚備。然而道化猶鬱，俗態尙陵，其故何也？殆郡縣之官類多俗吏，因陋就寡，拘文牽義，未能不揚陛下之本意，曉之于民也。是以百里不同風，千里不同俗，長民乏不二之懿，比屋無可封之期。父子德色于擾鉏，鴟鵂惡音于桑黠，齊民輕徙，異物屢遷。故臣前已言郡守擇任之之不精，今復見縣令授受之失實也。臣聞古人有言：郡守縣令，民之師帥。師帥不賢，主德不宜。且陛下所與治斯民，無愁歎之聲，驅一世于仁壽之域，欲安責乎？上宜倚于州，下宜委于縣。是縣令郡守與王者分挈教民權也。今之縣令，職廝祿薄，與匹庶無異，非才能驚頓，卽齒髮耄耋，力事上官，應塞詰責之暇，何與論繩墨之外語教化之原哉？此不稱陛下之治一也。就使豪英之士，薰白之人，欲懷行樹風，作爲條教，懷誠秉義，告之話言，而盜憎主人，更見指目，權輕不足自鎮，民蕩因以忘反，故四維張而不具，皇極建而未協，此不稱陛下之治二也。禮以防欲，樂以和情，政以正名，刑以禁暴，四者相須而行，未有知其所由來者也。今之吏治，一切以法驅之，媮合苟安，日闕而已，非有長幼之序，和樂之節，廉愧之砥，孝弟之行，以漸化之也。是以風尙頽替，姦僞波煽，棄禮者無畏，犯義者不刑，上下相毆，以多自證，此不稱陛下之治三也。自文考嚮學，髦士聚朝，廟堂謀謨，朝夕獻納，詔令所下，皆際天人之分，據古今之誼，兩漢深訓，五典常道，而縣吏庸淺，類不能曉，而欲使下情無壅，大教胥洽，人人感知上意，不可得矣。此不稱陛下之治四也。由是天秩久紊，邦教彌翦，賢者恥其冗，則不事以爲高，愚者甘其疲，則厚斂以自慰，孰肯爲陛下懇懇于收養，孜孜于教導？

哉。臣以爲當今之宜，莫如按舊章，定新制，悉取朝著，使典民社，厚其祿，以責其廉，釀其賞，以規其效。百里之內，有能興儒術，闢汙萊，明論詔恩，勒恤民疚，順孫孝子，日以衆多者，爲高第，逮捕盜賊，擊搏豪強，租更先期，獄訟無濫，操切下吏，文符如流者，爲中第。因循故常，無所澄正，不能興譽，亦無用咎者，爲下。又重選良二千石，使互相帖領，數年之後，上計大比，且觀其能。三第中者，擢于衆而選之，不中者，罰其劣而遣之。益儲時才，以待官乏。陛下于此，炳焉與三代之化，巍乎建千載之間，使術有序，黨有庠，歲時以鄉飲酒禮，而綴其驩，時時頒牛酒，以勞力，口孝弟，恤鰥寡，問高年，建爲成規，授以方國，上有龔黃之守，以承藝極，下有蒲密之令，以勒宣布，出令若流水，傳命如置郵，陛下高拱以取尊名，不勞而定大計，推放四海而準，四維泰山而安，風俗敦龐，猶家至日見，威神振疊，若雷聲淵默，掃除五代之跡，而悉去之，簫勺他腸，平鑄糝政，化業一定，千百載咀馨實，挹清名者，歌吟不絕，寧與勞心于內，無成功于外者，竝日而語哉。臣故曰：俗失由于官邪，郡守是已。官邪由于任輕，縣令是已。以犬馬畜之，彼將犬馬自爲也。以滅裂耕之，彼將滅裂報我也。君以民爲本，民以吏爲師，民不知教，則國本易搖，吏不奉承，則君命幾辱，且不材之士，自知爲清議所去，甘心處賤，忘懷廉槩，欲使之撫民屋，興化條，不爲國取侮者，無幾矣。

贊曰：震驚百里，王法是擬，建爾縣公，擬我民紀，官者寢輕，治聲沒振，不念牛刀，遂傷獸錦。

臣聞爲川者決之使導。爲民者宣之使言。以言爲諱。最國之患也。昔姚虞能聳其德。以被四表。禹戒之曰。無若丹朱。成王克勤其身。以膺天下。周公戒之曰。無若王紂。此兩人者。非不知二后睿聖之親事也。非蓋君之美而不稱也。非邀忠之名以取高也。以爲神器之重。元首之尊。必推之大衰。乃可與言盛。必懼之將亡。乃可與圖存。故夫臨層崖不測之深。雖勇者知畏。足九京空墟之上。雖昧者知哀。舉危亡絕滅之世。雖上聖或懼。是以舜成王知苦言之可以發憤治體。切而不愧也。禹周公知至訓之可以鞏固後葉。發而不疑也。古者大夫規誨。士傳言。庶人謗。商旅議于市。百工獻藝。位之有典。倚几有諫。警御有箴。史不失書。矇不失誦。近獻其辱。遠達其聰。神明不遺。而德被天下也。秦暴漢雜。禁忌始興。誹謗坐誅。妖言有法。宣帝中興之賢主。寬饒以五帝之勅。屍橫都市。章帝東遷之長者。梁鴻以五噫之刺。身竄海嶠。是時網目已密。而言路未榛。故劉向引驪山以喻成。蔡邕指七國以諷桓。轉移大謀。多所毗益。當時君上。亦不拘忌爲急。故文帝之詔曰。不敏無明。久臨天下。朕甚自愧。明帝之詔曰。方今上無天子。下無方伯。又反支日許。上章奏。斯亦罪己克躬之明效。故功成當世。名昭萬代。不爲諂子。嗚也。且夫諱亂無益于治。而諍臣爲之杜口。文惡有害于善。而佞人得以取容。始皇推一至萬。胡亥惡言盜賊。不能救已危之基。宋明給三百年期。改驕避禍。不能損速顛之運。由是而言。則小數禁忌之不足任。亦已明矣。故善君人者。曠然深鑒其失。忻然樂聞其過。謀及藿食。擇于狂夫。謂天命難諶。則勤勤不寐。以趣太平之路。謂人心惟危。則栗栗如隕。以據大

安之勢。不諱廢興。不隱過失。則天下無遺慮。人臣無伏言。此五帝三王所以克荷鴻名而常爲稱首者。用此道也。

孝治篇

臣聞。火生于木。木盛于火。有子母相養之道焉。火之在氣也。蒸燠溫厚。萬寶以蕃。在精也。宣揚發暢。羣幽爭附。故謂之孝。夫孝者。天地之性。人之所由靈也。聖人因天之明。儀物之則。所以鎮天下國家。擬百度之體者。非孝無以用之。伏惟我朝。炎靈儲暉。赤制改物。得天正統。爲人元首。故感帝所稟。繼世尤盛。自太祖躬武節。對天下。太宗右文誼。興邦教。真宗建天封。垂大章。萬歲之後。皆以至孝冠乎大號。陛下躬萬國之籍。鑑三綱之嚴。上承東朝顏色之養。追嗣文王遜駿之烈。重華之德斯協。三年之言乃驩。再駕至陽位。躬接上帝。仍歲侑清廟。祇薦徽色。所以助宣火德。勤服孝治之道。可謂備矣。然而禮當行者。頗或未舉。政宜革者。尙憚更張。是以善物頽陵。末俗澆弛。故臣願爲陛下一數于前。臣誠至迂。未許所言必當。猶冀不隱下情。極上報之節。臣伏見漢家。取士有孝廉之科。以抗方正茂才之選。下詔有孝悌之目。以偕力田繆寡之賜。是時。人得祿仕。咸矜節尚。言值模楷。行觸規矐。以化鄉黨者。不可勝計。乃至名臣輩出。節士相望。退修之家。進刑于國。飴變周原之董。黜革泮林之鴉。漢家得人在茲數路。今四海之富。億姓之醜。士不以廉舉。家不以孝聞。蚩氓無知。流俗忘返。以爲孝愛之道可得而廢。殆非克稱陛下助宣火德之意也。今胡不

搗爲科第。以勸其來。峻之刑章。以禁其弊。踞砥石。磨天下之鈍。振大本。觀百枝之搖。其誰不懍行樹。惇以企旌車之招矣。古者天子七廟。諸侯五廟。大夫三。士二。官師一。庶人無廟。祭于室而已。羞不踰牲。寢不踰廟。燕不踰祭。所以盡誠信。交神明。怵惕悽愴。志意嘆息。洞洞屬屬。而如將見之。所以教人思其親。示有先也。洎唐家有國。大臣猶得立廟于京師。五代相殘。其禮遂廢。朝家受命。猶循舊章。禮雖上建。型不及物。夫大臣國之四體。民之具瞻。而使亡其等威。下與人同祭室之禮。殆非邦家之寵也。今縱未能惇崇古制。猶當斟酌近禮而用之。自臺省大臣。咸許立廟于私第。祿微者祭近。位高者祭遠。使四方之士。震動其教。澡雪其心。舉而措之天下。無難矣。昔之喪親者。葬之中野。不封不樹。後世聖人。稍制其禮。夏氏以聖。商人以棹。周家以娶。姬旦以祔。浴于靈。飯于脯。小斂于戶。大斂于階。祖于庭。葬于墓。諸侯五月。大夫三月。士踰月。有若防者矣。有若斧者矣。自叔葉菲廢。漸用火葬。父母之重。親舉而焚之。衣冠委于煙埃。骨肉熾于薪炭。神靈寬懼。何痛如之。昔楚敗吳師。子期將焚之。子西曰。父兄親暴骨焉。焚之不可。彼當紛擾之際。尙憚其酷。今乃禮義之族。習以爲常。豈不爲長太息哉。傳曰。有焚其先人之室。則三日哭。又孝有傷足者。憂。律有殘尸者。死。况夫示遠之典。全歸之體。并焰而滅。與灰俱冷。非名方于傷足而惡。等乎殘尸者哉。今茲不制其防。臣恐孝誼之風。由茲微矣。臣願朝家明著律令。風諭天下。絕其委巷之禮。以全爲子之恩。亦以厭火德。當神祇之心。張國維。一民俗之變。經曰。明王以孝治天下。此物此志也。

誣虛名篇

臣聞天下之譽有不虞而至。天下之毀有無方而來。古今之常患也。惟聖人爲能察之。昔荀息晉國之柱。禮獻公之肱。膺目女戎之內敗。耳恭世之前死。文惠以讒獲罪。奚卓以孽代宗。而息不能拂君邪心。除國大蠹。方且激忠亮之對。貫生死之誓。終輔二子。不食其言。是以爲忠也。臣謂之不然。夫知其所事之謂忠。得其所死之謂義。苟荀息爲忠。則惡來死紂。紛如死齊。皆可以爲忠矣。尾生一介之賤。奔三粲之誓。水至不去。抱梁而死。是以爲信也。臣聞五常無體。惟正爲體。所貴乎信者。內與道接。外與誠應也。若尾生爲信。則復關上宮。皆可以爲信矣。此所謂不虞之譽也。漢王嘉身備上宰。忠正王室。疾佞幸之讐。互爭大誼。而靡切破壞。奸黨動寤上心。遭主不明。仆死牢械。何武都上公之重。踣廣朝之表。當哀帝卽世。王莽復用。炎崑之焰。雖始稽天之浸。尙微武與公孫祿。創外戚之厲階。懼帝劉之孤弱。圖任端士。柄持大政。謀雖不臧。誼亦無愧。而班固以爲一黃郛江河。用沒其身。是以爲貶也。若嘉武以喪生爲貶。則孔光褚淵。視面全生。皆可以爲賢矣。齊管仲相。蕞爾之國。膺蕩然之運。然而內寓軍令。遂尊王室。諸侯震動。四夷賓輯。存亡繼絕。首乎五霸。微管仲。吾其被髮左衽矣。所謂爲臣之極。擊建功于當年。而孟軻恥于願爲。曾西慚于見比。揚子雲亦稱。仲尼之門。五尺童子。羞比晏嬰夷吾。是以謂之霸也。夫言有累刻。無高而不躋。事有算實。居然而挺效。賢者遭遇異世。亦功名殊軌。必待堯舜之主。此言志士終無時也。若夷吾以立功爲羞。則迂闊

投關皆可爲王者之佐矣。此謂無方之毀也。昔君子于春秋求名而亡欲蓋而彰。非斯文之暨乎。